

# Terima PhD selepas tiada

**Serdang:** “Walaupun dia dah tak ada tetapi saya bersyukur hajat dia untuk jadi doktor falsafah tercapai juga,” kata Noor Asmat Hassan, 35, yang mewakili suaminya, Hazril Azmin Saari menerima Ijazah Doktor Falsafah (PhD) Teknik dan Vokasional pada Majlis Konvokesyen Universiti Putra Malaysia (UPM) ke-38, di sini, semalam.

Hazril Azmin tidak sempat melalui detik manis itu bersama keluarganya kerana meninggal dunia

akibat kanser tisu tulang tahap empat pada 1 Jun lalu.

Menurut Noor Asmat, ketika hayatnya, arwah suaminya itu berusaha keras untuk mengejar cita-citanya bergelar doktor.

“Saya masih ingat, kalau buat

**NOOR Asmat bersama anaknya melihat PhD yang diterima bagi pihak arwah suaminya.**

tesis dia akan fokus sampai habis.

“Malah, walaupun sakit arwah masih sempat fikir sama ada dia sempat atau tidak membentangkan tesisnya kepada panel penilai.

“Hari ini (semalam) saya tunai hajat dia. Terima kasih kepada pihak UPM kerana cuba anugerahkan juga dia PhD walaupun dia dah tak ada lagi,” katanya sebak.

Mengimbau pemergian Hazril Azmin, Noor Asmat berkata, ketika itu mereka bersama dua anak Noor Hanania Faqehah, 7, dan Muhamad Firas Hijazi, 5, bercuti di kampung halamannya di Jerantut, Pahang.

“Walaupun doktor berpesan supaya bersedia, tetapi saya tak fikir dia akan pergi secepat ini kerana kami usahakan mengubatinya dengan cara kampung dan moden.

“Dia hanya sempat meminta jangan bersedih dan berpesan menjaga anak dengan baik selain tunai solat pada awal waktu,” katanya.

Sementara itu, Anna Arina Ab Halim, 24, dari jurusan Sarjana Muda Pertanian menyifatkan kejayaannya memperoleh Purata Nilai Gred Kumulatif (PNGK) 3.75 di luar jangkaan.

Selain cemerlang dalam akademik, gadis berasal dari Pasir Mas, Kelantan itu turut aktif dalam kegiatan di kampus sekaligus melayakkannya merangkul tiga anugerah iaitu Pingat Emas Canselor, Emas Profesor Emeritus Tan Sri Dr Rashdan Baba dan Agribio dalam konvokesyen berkenaan.

